



阿棋伯

「阿棋伯！」

「鬚赤赤！鹽來滷，石頭砵！砵兩埕，請人客！」

阿棋伯係青草仔師傅，每擺係喊佢，佢都係恁樣笑連連仔應過來，總會弄到兩子阿伯哈哈大笑。去山頂擲青草仔轉个臨暗仔，阿棋伯會在雜貨店前頓腳一下，坐寮、打嘴鼓。莊下个青草仔師傅無店面、頭擺人無電話，愛阿棋伯正奈得何个頭路，輒常都會利用雜貨店搭信分佢。

在阿婆、阿太个時代，西藥行還異罕得見，廟項大體都有出藥籤。運勢毋好，問神明看哪爭差，抽運籤；身體毋好，也去求神明，抽藥籤。神明个藥籤仔，除忒漢藥店个漢藥，乜有山排、河壩脣就有个青草仔。毋過，尋毋著羊乳仔、山葡萄个人，會去拜託阿棋伯；乞食碗、雷公根懸懸分毋清楚个人，乜愛去勞煩阿棋伯。因為，阿棋伯就係莊項个青草仔師傅，好心个阿棋伯還輒常教細人仔：

「哦呵！阿珠又屙痢肚了！該机仔芯啊，捏成兩(liong')仔煲水食，看擋得著無？！」

「阿菊，煲青草茶哦！這啊，這片石壁个鳳尾草、牛鬥舐都當萋當淨，大河壩該位个剝節草、筆仔草也生到靚靚了。」

「阿松！擲蝦公夾，愛該片个啊，幼花个較好啦！」

「羊乳仔燉雞仔，顧腳筋異好，毋過羊乳仔較冷，冷底个人莫食恁多正好！山葡萄煲豬腳，細人仔有擲高、無擲高乜食一肚飽！」親像阿棋伯還在該笑弛弛講等話樣仔，毋多知仔佢就過身十過年了。這下个山園，滿哪仔都怕有農藥，大家乜無恁好膽儘採就去取青草仔。醫院又有恁發展了，神明都早早分政府禁止開藥單仔欸，莊下个青草仔師傅也就摻神明个藥籤仔共樣，只留轉在頭擺个頭擺了。

過可惜，佢毋記得問阿棋伯：「該老阿伯仔分人砵兩埕，請人客个，係鹹菜無？」

作者：彭瑞珠

☆詞彙學習☆

【羊乳仔】iong' nen e'：臺灣天仙果，又名臺

灣榕、小本牛乳蒲、羊奶頭。

【牛鬥舐】ngiu' deu se'：海金沙。

【剝節草】bog' jied' co'：臺灣木賊。

【乞食碗】kied' siid von'：含殼錢草。

【筆仔草】bid' e' co'：金絲草。

【雷公根】lui' gung' gin'：蚶殼草、老公根。

【蝦公夾】ha' gung' giab：咸豐草。

☆文法學習☆

【生到靚靚】sang' do jiang' jiang'：本文意為「長得非常繁茂」。在「V 動詞 + 到 + C 補語」的句型中，「到」用來引介、表現動作的結果或程度，同國語的「得」。

例 1：佢做事做到汗流脈落，一身潦潦。（他工作做得滿身大汗，全身濕透了。）

例 2：該細人仔張人，噉到噉嘶。（那小孩使性子，哭得很厲害。）